

## HUGHES, OWEN ('Glasgoed'; 1879 - 1947); swyddog rheilffordd, masnachwr a bardd

**Enw:** Owen Hughes  
**Ffugenw:** Glasgoed  
**Dyddiad geni:** 1879  
**Dyddiad marw:** 1947  
**Priod:** Kate Hughes (née Elliss)  
**Rhiant:** Mary Hughes  
**Rhiant:** William Hughes  
**Rhyw:** Gwryw  
**Galwedigaeth:** swyddog rheilffordd, masnachwr a bardd  
**Maes gweithgaredd:** Diwydiant a Busnes; Eisteddfod; Barddoniaeth  
**Awdur:** Evan David Jones

Ganwyd yn y Glasgoed, Cwm Prysor, Meirionnydd, yn un o 10 plentyn William a Mary Hughes. Cafodd ychydig addysg yn ysgol Ty Nant a Maentwrog Uchaf, ond bu raid iddo fynd allan i weithio yn 9 oed. Symudodd i weithio ym mhyllau glo Cwm Rhondda yn 1900. Bu yno am tua 6 blynedd gan ddod o dan ddylanwad Diwygiad 1904-05 fel y dengys ei emynau. Dychwelodd i'w hen ardal yn 1906, a'r flwyddyn honno enillodd gadair eisteddfod Rhosesmor.

Ymfudodd i Winnipeg wedyn, ac yno y bu am 20 mlynedd yn weithgar yn yr eglwys Gymraeg a chyda Chymdeithas Dewi Sant. Bu'n swyddog gyda Rheilffordd Genedlaethol Canada, ac yna sefydlodd fasnach lwyddiannus. Symudodd i Galiffornia a thracheffn i Vancouver. Enwogodd ei hun ar feysydd chwarae gan ennill cwpanau a gwobrau. Medrai siarad a darllen 8 iaith. Mabwysiadodd yr enw barddol 'Glasgoed' oddi wrth ei gartref ym Meirion. Enillodd fwy o gadeiriau ac awdlau rhwng 1923 ac 1940 na neb arall yn America. Yr oedd yn fardd meddylgar ac yn gynganeddwr gwych.

Priododd Kate Elliss o Gaernarfon a fu farw yn 1941. Bu yntau farw 29 Awst 1947, a chladdwyd ef yn Vancouver.

### Awdur

**Evan David Jones**, (1903 - 1987)

### Ffynonellau

*Y Genhinen*, 4, 168-74

Dwy gerdd a llythyrau ganddo yn Llyfrgell Genedlaethol Cymru, Casgliad J. W. Jones, 2445-559, 291/60, 414/33, a Chasgliad Bob Owen, 32/3/25

### Dolenni Ychwanegol

Wikidata: Q20734076

**Dyddiad cyhoeddi:** 1997

**Hawlfraint Erthygl:** <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

#### Arddull APA

x

Jones, E. D., (1997). HUGHES, OWEN ('Glasgoed'; 1879 - 1947); swyddog rheilffordd, masnachwr a bardd. *Y Bywgraffiadur Cymreig*. Adferwyd 20 Tac 2024, o <https://bywgraffiadur.cymru/article/c5-HUGH-OWE-1879>

LGC  
NLW

LLYFRGEL  
THE NATION



Ysgrifeddiadau  
Llywodraeth Cymru  
Copied by  
Welsh Government